

**Isertitat annertussusaat malillugit utoqqalinermi soraarnerussutisiat  
ilanngarneqartarunnaarlutilluunniit atorunnaarsinneqartarunnaarsillugit,  
Naalackersuisut utoqqalinersiaqarneq pillugu Inatsisartut inatsisaannut  
allannguutissatut siunnersuummik suliaqarnissamik peqquneqarnissaannik  
Inatsisartunut aalajangiiffigisassatut siunnersuut  
(Inatsisartunut ilaasortaq Mariane Paviasen, Inuit Ataqatigiit)**

**pillugu**

**Ilaqutariinnermut Peqqissutsimullu Ataatsimiititaliap**

**Siunnersuutip aappassaaneerpeqarnerani**

**ISUMALIUTISSIISSUTAA**

Ataatsimiititaliap suliarinninnermini ukuningga inuttaqarpoq:

Inatsisartunut ilaasortaq Pipaluk Olsen, Demokraatit, siulittaasoq  
Inatsisartunut ilaasortaq Aki-Matilda Høegh-Dam, Naleraq, siulittaasup tullia  
Inatsisartunut ilaasortaq Bo Martinsen, Demokraatit  
Inatsisartunut ilaasortaq Paarma Lund Kreutzmann, Inuit Ataqatigiit  
Inatsisartunut ilaasortaq Aqqalu C. Jerimiassen, Atassut

UKA 2025-imi ulloq 17. oktober siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Ukiumut isertitassat annertussusaat aalajangersimasut qaangerneqaraangata utoqqalinermi soraarnerussutisiat ilanngarneqartarunnaarnissaat siunnersuutigineqartumi siunertaavoq. Isertitat qaffasinnerpaaffeqartinneqarnerisa atorunnaarsinneqarnissaa pillugu UKA2026-imi siunnersuummik Naalackersuisut saqqummiussaqaassatut siunnersuuteqartup kissaatigaa.

**Siunnersuutip Inatsisartunit siullermeerneqarnera**

Ataatsimut isigalugu siunnersuutigineqartut marluk tapersorsorluarneqarput, immikkoortorlu ataatsimiititaliami suliarineqartussanngorlugu innersuunneqarluni.

Siullermeerinninnermi allannguutissatut siunnersuummik imaattumik Naalakkersuisut saqqummiussaqrput:

*“Soraarnerussutisiaqarnermut aqqissuusseqqinnermi appariartuaartitsinissamut killiliussat iluarsiat ilanngunneqarsinnaaner at pillugu immikkut ilisimasallit misissussagaat peqquneqassasut”*

### **Siunnersuutip aningaasatigut kingunerisassai**

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassasut.

Siunnersuutip piviusunngortinneqarnissaanut aningaasatigut kingunerisassai siunnersuummut naapertuuttoq, taamaalilluni piffissami 2025-2050-mi ukiumut 79-118 mio. kr.-inik aningaasartuuteqarneruffiussasoq ataatsimiititaliap maluginiarpaa.

Isertitat qaffasinnerpaaffeqarnerisa atorunnaarsinneqarneratigut aningaasaqarnikkut kingunerisassanut tunngatillugu siunnersuuteqartup Naalakkersuisullu akissuteqaataani assigiinngitsut marluk takutinneqartut ataatsimiititaliap maluginiarpaa. *Utoqqalinersianik appariartuaartitsinerup atorunnaarsinneqarneranut aningaasartuutaanerusut pillugit nassuiaammi<sup>1</sup>* naatsorsuinerit kingulliit ataatsimiititaliap atorpaa.

### **Apeqquteqaat**

Ataatsimiititaliap siunnersuummik suliaqarnerminut atatillugu atugassaminik apeqqutit arlallit akineqarnissaat pillugu Isumaginninnermut, Suliffeqarnermut, Ineqarnermut, Attaveqaasersuutitut Isorliunerusunullu Naalakkersuisoq ataatsimiititaliamit qinnuigineqarpoq. Ataatsimiititaliap apeqqutaasa assilineri aamma Suliffeqarnermut, Ineqarnermut, Attaveqaasersuutitut Isorliunerusunullu Naalakkersuisup akissuteqaataa isumaliutissiissummut matumunnga ilanngussaq 1-tut ilanngunneqarpoq.

### **Ilisimatitsiffiusumik ataatsimeeqatigiinneq**

Ulloq 7. april ingerlanneqartumi Isumaginninnermut, Suliffeqarnermut, Ineqarnermut, Attaveqaasersuutitut Isorliunerusunullu Naalakkersuisoq ilisimatitsiffiusumik ataatsimeeqatigiinnermut ataatsimiititaliaq aggersaavoq. Ataatsimiititaliap apeqqutigisai isumaliutissiissummut matumunnga ilanngussaq 2-tut ilanngunneqarpoq, allakkatigut apeqqutigineqartunut akissuteqaammik ataatsimiititaliaq tigusaqanngilaq.

---

<sup>1</sup> [Nassuiaat: Utoqqalinersianik appariartuaartitsinerup atorunnaarsinneqarneranut aningaasartuutaanerusut](#)

**Ataatsimiititaliap siunnersuummut oqaaseqaatai**

Utoqqalinersiallit atugaasa pitsanngorsarneqarnissaat pillugu politikikkut isumaqatigineqartoq ataatsimiititaliap maluginiarpa. Utoqqarnut tunngasuni suliaqarnermi utoqqalinersiallit ukiuni aggersuni amerliartortuarnerat ataatsimut isigalugu sulisoqarnikkut aammalu pisortat aningaasartuuteqarnerulernerannik kinguneqarnissaa unammillernarnissaa ataatsimiititaliamit aamma maluginiarneqarpoq. Isertitali qaffasinnerpaaffeqarnerisa atorunnaarsinneqarneratigut pitsaaqutigisinnaasanut ajoqutigisinnaasaanullu tunngatillugu kingunerisinnaasat pitsaanerusumik ilisimasassanik tunngaveqarnissaq pisariaqartinneqarpoq. Naalakkersuisut allannguutissatut siunnersuutaat akuerineqarpat, immikkut ilisimasallit arlaannaanulluunniit attuumassuteqanngitsut, soraarnerussutisianut aaqqissuusseqqinissamut tamakkiisumik annertusisamillu misissuinereranut kaammattuuteqarneranullu suliaqarnissaanut kinguneqassaaq.

Tamatuma saniatigut maannakkut naalakkersuisooqatigiinnissamut isumaqatigiissut malillugu immikkut ilisimasalinnik pilersitsisoqassasoq aammalu 2026-imi politikikkut isumaqatigiissusiornissamut piviusunngortinneqarnissaanut soraarnerussutisianut aaqqissuusseqqinissamut pisariitsumik aningaasatigullu attanneqarsinnaasumik kaammattuutunik suliaqartoqassasoq Naalakkersuisut erseqqissaatigaa. Aammattaaq Naalakkersuisup akissuteqarnermini ilisimatitsissutigaa, Immikkut ilisimasallit utoqqalinersianik sulilluni isertitaqarnermi ilanngaassisarmi malittarisassat allanngortinneqarnerisa sunniutigisinnaasaat pillugu misissuusseqqissaarnermik suliaassinneqareersimasut.

**Ataatsimiititaliap inassuteqaatai**

- **Ataatsimiititaliami amerlanerussuteqartut** Demokraatit aamma Inuit Ataqatigiit Naalakkersuisut allannguutissatut siunnersuutaat **akuersissutigineqarnissaa** inassutigaa.
- Taamatuttaaq Naalakkersuisunut ataatsimiititaliap kaammattuutigaa:

”Immikkut ilisimasallit suliaat sapinngisamik piaartumik naammassineqarnissaa pillugu Naalakkersuisunut kaammattuutigineqassasoq ataatsimiititaliap kissaatigaa, utoqqaat atugaannut suliaq akornusersuisoqannginnissaa imaluunniit kinguarsaasoqannginnissaa pingaaruteqarmat. Utoqqaat soraarnerussutisiaat ilanngaasinngikkaluarlugit sulisinnaasariaqartut ataatsimiititaliap erseqqissaatigaa, immikkullu ilisimasallit sukumiisumik misissuinerminni tamanna qulakkiissagaat Naalakkersuisunut inassutigalugu.”

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.

---

Pipaluk Olsen  
Siulittaasoq

---

Aki-Matilda Høegh-Dam  
Siulittaasup tullia

---

Bo Martinsen

---

Paarma Lund Kreutzmann

---

Aqqalu C. Jerimiassen